



Attachs al provedimaint central da chalur cumünal in Runatsch e Palü

La suprastanza cumünala ha approvà la dumonda da princip e da proseguimaint pel proget da schlargiamaint dal s-chodamaint central in Runatsch/Palü, Zernez. Uossa han amo las partidas chi han dumondà ün simil attach da confermar lur voluntà.

Surdatta d'incumbenza – elavuraziun charta d'intervenziun planisaziun d'emergenza in cas dad aua

Sün pretaisa da l'uffizi da god e privels da natüra sto il Cumün da Zernez elavurar las intervenziuns d'aua sül territori cumünal. L'incumbenza per executar quistas lavurs es gnüda surdatta al büro Caprez SA, Zernez.

Zernez, SIE Laschadura 1 – dumonda da princip e surdatta da lavur

La via da god Laschadura es in ün nosch stadi ed üna sanaziun e refacziun es necessaria (schlargiamaints punctuals, adattamaints dal access pro la via chantunala, divers spalüdamaints, rimplazzamaints punctuals da la vetta fina, mürs da sustegn). Cun la sanaziun previsa es garantida eir per l'avegnir üna cultivaziun dal God da las Chassetas, God da Crusch e God Curtinè. Implü vain garanti ün access sufficiaint al temp d'hoz per l'Alp Laschadura. La suprastanza cumünala ha approvà l'inizi dal proget e surdat las lavurs d'impressari per realisar la prüm'etappa.

Büro electoral per las votaziuns ed elecziuns cumünalas, chantunalas e federalas dals 15 mai 2022

La suprastanza cumünala ha elet il büro electoral per las votaziuns dals 15 mai 2022. Al büro electoral fan part: Emil Müller sco president, Seraina Bickel, Riet Denoth, Erich Sulser, Ladina Rodigari, Susanna Denoth, Claudia Duschletta e Corsin Scandella sco actuar.

Discussiun da podium – presidi cumünal

Il gremi respunsabel ha trattà e discutà in sia sezzüda sur d'üna dumonda entrada da duos votants per üna discussiun da podium per las elecziuns dal presidi cumünal dals 15 mai 2022. La suprastanza cumünala es gnüda a la conclusiun da na vulair organisar svesc sco cumün üna simla occurrenza. Il Cumün da Zernez sustegna gugent a societats o gruppaziuns chi organischeschan üna discussiun da podium cun metter a disposiziun l'infrastructura ed otras lavurs da sustegn.

Plünavant ha annunzchà la Posta Ladina da vulair publichar in sia gazetta a temp ün artichel extais cun la preschantaziun da tuot ils candidats.